

Pantaloni innamorati i quali narrano il loro amore

Vecchietti innamorai  
nu semo, care fie,  
Quai semo qua arrivai  
Da vostre signorie  
Per narrarve il brusor  
Ch'avemo dentro al cuor.

Aldite la cagion  
Del nostro vegnir qua,  
E co' avè la rason,  
Sentì vu co' se fa:  
Ne darè la sentenza  
De questa differenza.

Nu amemo caldamente  
Certi visetti d'or,  
E brusemo talmente  
Nel petto per so amor  
Che semo tutti fuoco  
E no trovemo luogo.

Gh'usemo servitute  
Ghe femo sberrettae  
E le avemo tegnue  
D'ognora presentae  
E in pe' de guiderdon  
La ne dà dei murlon.

La ne dise chilosì,  
Balordi e inensai,  
E vecchi catarrosi  
E ne tien strapazzai,  
Co' se fossemo alfin  
Tanti aseni o fachin.

Nu ghe volemo ben,  
Ne podemo lassar  
L'impresa e ne sconvien  
Per forza seguitare  
Se l' ne crepasse il cuor,  
Ché così vuol Amor.

Né podemo magnar,  
Vardè se avemo strette,  
Cheé 'l ne sconvien pensar  
Sempre a 'ste mariolette,  
E farghe drio el corrier  
Tiò tiò che bel pensier.

Ghe femo, in conclusion,  
Tutto quel che se puol,  
E se starè al balcon  
De nu spasso se tiol,  
E s'ì ne tien fusai  
Meschini ammartellai.

E se ben ve paremo  
Così bianchi e canui,  
Per questo se sentemo  
In gambe e ben forzui,  
De star al parangon  
Se l' vien l'occasion.

E no semo fraschette  
Co' sé 'sti sbarbadei,  
Che sora le barette  
I porta i so cervei,  
E ad ogni ventesel  
I suol voltar mantel.

Nu semo in una etae  
Che no podem fallar  
Più d'instabilidae,  
E ghe podemo dar  
Conseio de parol  
E aiuto, se le vuol.

Mo le sé s'ì ostinae  
E senza compassion  
Che le sta retirae  
Né vuol in conclusion  
Aldirne nominar,  
Vardè vu che bel far.

Donca, fie care e belle,  
Dè la sentenza vu,  
S'in questo l'ha torto elle  
O veramente nu,  
Elle a starne a foiar  
E nu a volerle amar.

Pensegne un poco sora,  
Vu ch'avè l' cervel san,  
E spendè una mez'ora  
Per nu, perché doman  
Tornarem, se 'l ve par,  
A aldirne sentenziar.

Testo tratto da: **Pantaloni innamorati, i quali narrano il loro | Amore. Di Giulio Cesare Croce.** |  
[segue testo] | [Alla fine:] **In Bologna, per Bartolomeo Cochi 1613. Con licenza de' Superior.**  
[sic]